

# Inatsisartut Naalakkersuisullu pillugit Inatsisartut inatsisaat

Juni 2020

## Inatsisartut Naalakkersuisullu pillugit Inatsisartut inatsisaat nr. 26, 18. november 2010-meersoq

Inatsisartut inatsisaata nr. 12, ulloq 29. november 2013-imeersup, Inatsisartut inatsisaata nr. 30, ulloq 9. december 2015-imeersup kiisalu Inatsisartut inatsisaata nr. 2, 29 maj 2020-meersup malitsigisaannik allannguutitalik

Inatsisartut Naalakkersuisullu pillugit Inatsisartut inatsisaat nr. 26, 18. november 2010-meersoq, Inatsisartut inatsisaata nr. 12, ulloq 29. november 2013-imeersup, Inatsisartut inatsisaata nr. 30, ulloq 9. december 2015-imeersup kiisalu Inatsisartut inatsisaata nr. 2, 29 maj 2020-meersup malitsigisaannik allannguutitalik

Inatsisartut Allattoqarfianit ataatsimut allanneqarlunilu saqqummersinneqartoq  
Juni 2020

## Inatsisartut Naalakkersuisullu pillugit Inatsisartut inatsisaat nr. 26, 18. november 2010-meersoq

Inatsisartut inatsisaata nr. 12, ulloq 29. november 2013-imeersup, Inatsisartut inatsisaata nr. 30, ulloq 9. december 2015-imeersup kiisalu Inatsisartut inatsisaata nr. 2, 29 maj 2020-meersup malitsigisaannik allannguutitalik

### Imai

Kapitali 1 Namminersorlutik Oqartussat

Kapitali 2 Inatsisiliortutut pissaaneq

Kapitali 3 Nunanut allanut sillimaniarnermullu tunngasut

Kapitali 4 Atuutsitsisutut pissaaneq

Kapitali 5 Atuuffinnik allanik tigummisaqarneq

Kapitali 6 Inatsisartunut nutaamik qinersineq aamma Naalakkersuisunik atuukkunnaarsitsineq

Kapitali 7 Inatsisartut inatsisaasa il.il. atuuttutut atsiorneqartarnerat atuutilersinneqartarnerallu

Kapitali 8 Atuutilerfia

**Inatsisartut Naalakkersuisullu pillugit inatsisartut inatsisaat nr. 26, 18. november 2010-meersoq, Inatsisartut inatsisaata nr. 12, ulloq 29. november 2013-imeersup, Inatsisartut inatsisaata nr. 30, ulloq 9. december 2015-imeersup kiisalu Inatsisartut inatsisaata nr. 2, 29 maj 2020-meersup malitsigisaannik allannguutitalik**

### **Kapitali 1**

*Namminersorlutik Oqartussat*

§ 1. Kalaallit Nunaanni Namminersorlutik Oqartussat suliassa qarfiit tigusatik pillugit inatsisiliortutut atuutsitsinissamullu pissaaneqarput. Eqqartuussiviit, Namminersorlutik Oqartussat pilersitaat Kalaallit Nunaanni suliassa qarfinnut tamanut eqqartuussivittut pissaaneqarput. Tamanna naapertorlugu inatsisiliorneq Inatsisartuniippoq, atuutsitsineq Naalakkersuisuniilluni eqqartuussivittullu pissaaneq eqqartuussivinniilluni.

## **Kapitali 2**

### *Inatsisiliortutut pissaaneq*

§ 2. Inatsisartut nalinginnaasumik, toqqaannartumik isertortumillu qinersinikkut ukiunut sisamanut qinerneqartunik 31-nik ilaasorta qarput. Nutaamik qinersisoqarsimatinnagu qanorluunniit pisoqaraluarpat ilaasortaaffiit annaaneqarsinnaanngillat.

*Imm. 2.* Inatsisartunut qinersinermut maleruagassat immikkut Inatsisartut inatsisaatigut aalajangersarneqassapput.

§ 3. Ilaasortat qinigaanerisa atuuttuussusiat kiisalu ilaasorta qanoq qinigaasinnaassusiiagaasinnaanersoq pillugu apeqqut Inatsisartut nammineerlutik aalajangigassaraat.

*Imm. 2.* Inatsisartunut ilaasortat qinigaasinnaassusiiagaasinnaavoq, pisumi inuup nalinginnaasumik isigineqarnermini Inatsisartunut ilaasorta arnermini ataqqinaataaruppat inaarutaasumik eqqartuussummik akiliisinneqarnermilluunniit akuersissuteqarnermik pinerluttulerinermi inatsisit tunngavigalugit pineqaatissinneqarsimaguni.

§ 4. Inatsisartunut ilaasortaaneq inuiaqatigiinnit toqqagaanikkut suliassiissutitut pisussaaffiuvoq.

*Imm. 2.* Inatsisartunut ilaasorta tunuarniuteqarpat imaluunniit sulingiffeqarnissamik akuerineqarquppat qinnuteqarneq akuerineqarsinnaanersoq Inatsisartut aalajangissavaat.

§ 5. Inatsisartut innimiginarluinnartussaapput.

*Imm. 2.* Inatsisartunut ilaasortat sulinerminni nammineq nalunneqatiginnissusertik kisiat tunngavigissavaat.

*Imm. 3.* Inatsisartut suleriaasertik nammineerlutik aalajangersassavaat.

§ 6. Inatsisartunut ilaasorta qinaluunniit Inatsisartuni nammineq oqaaserisaminut Inatsisartut avataanni Inatsisartut akueringgisaaannik akisussaatinneqarsinnaanngilaq.

*Imm. 2.* Inatsisartunut ilaasorta qinaluunniit, iliuseqarnermini pakasarneqarsimangippat, Inatsisartut akuersisimatinnagit unnerluutigineqarsinnaananilu qanorluunniit ittumik kiffaanngissusiiarneqarsinnaanngilaq.

§ 7. Inatsisartut nutaamik qinersinerup kingornatigut sapinngisamik piaartumik kingusinnerpaamillu ullut 45-t qaangiutsinnagit katersuuttassapput. Ataatsimiigiaqqusisuusaaq ilaasorta qivisunerpaamik Inatsisartunut ilaasortaasoq imaluunniit ilaasortat arlallit sivisoqatigiimmik ilaasortaasimappata angajulleq. Qinigaanerup nalilerneqarnissaata aammalu Inatsisartut Siulittaasoqarfiannik qinersisoqarnissaata tungaanut ilaasortat taassuma Inatsisartut ataatsimiinneri aqussavai.

§ 8. Inatsisartut aalajangiisinnaassuseqarput ikinnerpaamik ilaasortat affaat najuuppata. Aalajangiisoqartarpoq aalajangiineq taasisunit ilaasortat najuuttut affaanit amerlanerusunit taperserneqarpat.

§ 9. Inatsisartuni ataatsimiinnerit tamanut ammasuuppup. Taamaattorli Inatsisartut isumaqatigiissutigisinnaavaat suliassat ataasiakkaat matoqqasumik ataatsimiinnermi oqaluuserineqarnissaat. Suliassap matoqqasumik ataatsimiissutigisariaqarneranik apeqqut matoqqasumik ataatsimiinnermi isumaqatiginninniutaassaaq, taamaaliornissaq Inatsisartunit imaluunniit ataatsimiinnermi aqutsisumit aalajangerneqarpat.

*Imm. 2.* Inatsisartuni isumaqatiginninniarnert kalaallisut ingerlanneqassapput. Inatsisartunut Naalakkersuisunullu ilaasortat kalaallit oqaasiinik atuinngitsut danskisut oqalussinnaatitaapput, oqaasiilu kalaallisuut nutserneqassallutik taamatuttaarlu isumaqatigiinniarnert danskisut aamma malinnaaffigineqarsinnaassallutik.

*Imm. 3.* Inatsisartut isumaqatiginninniutaat taakkunungalugu ilanngussat tamanut saqqummiunneqartassapput kalaallisut danskisullu.

*Imm. 4.* Naalagaaffiup Sinniisaa Inatsisartut tamanut ammasumik ataatsimiinnerini najuuffiginninnissamik pisinnaatitaavoq.

§ 10. Inatsisartut katersuuttassapput Inatsisartut siulittaasuata pisariaqartitsisorineratut akulikitsigisunik, taamatullu aamma katersuuttassallutik Naalakkersuisut siulittaasuata imaluunniit Inatsisartunut ilaasortat ikinnerpaamik affaasa tamanna piumasarigaangassuk.

*Imm. 2.* Inatsisartut ileqqusumik katersuunnermi aalajangissavaat Inatsisartut tullianik ileqqusumik katersuunnissaannut piffissaq ataatsimiiffiususaaq.

§ 11. Inatsisartut Siulittaasoqarfiata ataatsimiinnissaq sioqqullugu Inatsisartut ilaasortaannut, Naalakkersuisunut Naalagaaffiullu Sinniisuanut oqaluuserineqartussatut naatsorsuutigineqartut nalunaarsorneri nassiutissavai. Nalunaarsuutit

tamanut saqqummiunneqassapput.

**§ 12.** Inatsisartunut ilaasorta q pisortat suliaasaataat pillugu paasissutissinneqarnissaminik kissaateqarpat, tamanna Naalakkersuisunut apeqquteqarnikkut pisinnaavoq.

*Imm. 2.* Naalakkersuisut apeqqummut akissuteqarnissaminut pisussaaffeqanngillat:

- 1) Naalakkersuisut paasissutissanik akissuteqarnissaminut atugassaminik pissarsisinnaanngippata,
- 2) malunnartumik piffissaq nukissallu paasissutissanik akissuteqarnissamut atugassanik pissarsiniarnermut atortariaqassappata, imaluunniit
- 3) paasissutissat kissaatigineqartut nipangiussisussaataitanermit ilaatinneqarpat.

**§ 13.** Inatsisartut inatsisissaattut, inatsisartut peqqussutissaattut aalajangiiffigisassanillu allanik siunnersuutininik Inatsisartunut Naalakkersuisunullu ilaasorta q kinaluunniit saqqummiussisinnaavoq.

*Imm. 2.* Kalaallit Nunaannut sunniutilinnik inatsisissatut naalagaaffilluunniit isumaqatigiissutissaattut danskit naalakkersuisuisa siunnersuutaat Inatsisartut aalajangiiffigisassaattut siunnersuutitut Naalakkersuisunit saqqummiunneqartassapput.

**§ 14.** Inatsisartut inatsisissaattut siunnersuutit inatsisitut ilusilerlugit saqqummiunneqassapput Inatsisartunilu pingasoriarlugit suliarineqassallutik.

**§ 15.** Naalakkersuisut ukiumi ukioq aningaasanut inatsiseqarfiusoq sioqqullugu kingusinnerpaamik novembarip ulluisa 15-ianni inaarutaasumik akuersissuteqarnissaq siunertaralugu ukiumut aningaasanut inatsiseqarfiusumut tulliuuttumut Inatsisartut aningaasanut inatsisissaattut siunnersuut saqqummiutissavaat.

**§ 16.** Inatsisartut Aningaasaqarnermut Ataatsimiititaliaat Naalakkersuisut aningaasanut inatsisissatut siunnersuutaata siullermeerlugu aappassaaneerlugulu oqaluuserineqarnerata akornanni nunap karsianut missingersuutitut siunnersuutit pillugit isumaliutissiissuteqassaaq, Inatsisartut isertitanut aamma aningaasartuutininik politikikkut ingerlatsinerannut najoqqutassianut pingaarnernut oqaaseqarfiginnillunilu siunnersuuteqassalluni kiisalu suliaasani Inatsisartunit Naalakkersuisunilluunniit ataatsimiititaliamut innersuunneqarsimasuni Inatsisartut sinnerlugit oqaaseqartassalluni.

*Imm. 2.* Inatsisartut Aningaasaqarnermut Ataatsimiititaliaata siunertanut aningaasartuutaasussat aningaasanut inatsisip akuersissutigineqarnerani siumut naatsorsuutigineqarsimanngitsut Inatsisartut sinnerlugit akuersissutigisinnaavai. Tamanna pillugu Inatsisartunut Inatsisartullu Ombudsmandianut aningaasartuutaasussat siunertanut aningaasanut inatsisip akuersissutigineqarnerani siumut naatsorsuutigineqarsimanngitsunut tunngatillugu aningaasartuutaasussat Inatsisartut sinnerlugit Suleriaaseq pillugu Ataatsimiititaliamit akuersissutigineqarsinnaapput, inatsisartut ataatsimiinnginneranni.

*Imm. 3.* Inatsisartut Aningaasaqarnermut Ataatsimiititaliaata aningaasartuutissatut akuersissutai ukiumoortumik ilassutitut aningaasaliissutinut inatsimmi, ukiumi aningaasanut inatsiseqarfiusumi tulliuuttumi Inatsisartut ileqquusumik siullermeerlutik ataatsimiinneranni oqaluuserineqartussami, katersorneqassapput.

*Imm. 4.* Naalakkersuisut aningaasanut inatsisip suliarinerani missingersuusiornermi maleruagassanik malittarisassat aalajangersassavaat

**§ 17.** Aktiaateqarluni ingerlatseqatigiiffinni Namminersorlutik Oqartussanit tamakkiisumik ilaannakuusumilluunniit pigineqartuni aningaasaliinissamik qularnaveeqqusiinissamilluunniit allatulluunniit aningaasatigut iluaqusiinissanik pingaarutilinnik siunnersuutininik qinnuteqaatinilluunniit ataatsimiititaliap suliarinninnerani atugassatut ingerlatseqatigiiffimmit pineqartumit, pisariaqarpat aktiaateqarluni ingerlatseqatigiiffiit pillugit inatsimmi ingerlatseqatigiiffilluunniit malittarisassaanni periarfissiisutaasut atorerisigut, paasissutissanik erseqqinnerusumik nalunaakkanik pissarsiniarnissamik Inatsisartut Aningaasaqarnermut Ataatsimiititaliaata Naalakkersuisut peqqusinnaavai. Ataatsimiititaliap kaammattuineratigut paasissutissat Naalakkersuisut pissarsiatik kinguarsaanertaqanngitsumik ataatsimiititaliamut atugassanngortissavaat.

*Imm. 2.* Paasissutissat ataatsimiititaliamit pisariaqartutut nalilerneqartut tigusissaasa tungaanut siunnersuutininik qinnuteqaatinilluunniit imm. 1-imi taaneqartunik suliarinninnini ataatsimiititaliap unitsikkallarsinnaavaa.

*Imm. 3.* Paasissutissat isertuussassatut tunniunneqarsimappata ataatsimiititaliami ilaasortat allallu ataatsimiititaliap oqaluuserinninnerani najuuttut imm. 1 naapertorlugu ataatsimiititaliami ilisimalikkaminik isertuussinissaminut pisussaataapput. Nutaatut ilaasortanngortoq kinaluunniit pisussaaffimmik tamatuminna eqquutsitsinissamik uppersaalluni atsiussaaq.

**§ 18.** Nunap karsiata Naatsorsuutaasa Kukkunersiorneqartarnerannut Ataatsimiititaliap nunap karsiata naatsorsuutai kukkunersuisullu taakkununga oqaaseqaataat ukiumut ataasiarluni misissortassavai, naatsorsuutillu pisariaqalersitaannik Naalakkersuisunut apeqquteqarlunilu oqaaseqarfiginnittassalluni. Apeqqutit oqaaseqaatillu Naalakkersuisut akissutaat ilanngullugit Inatsisartunut saqqummiunneqassapput.

*Imm. 2.* Ataatsimiititaliap nalilersinnaavaa suliffeqarfiit imm. 1 malillugu kukkunersiuinermit ilaasut aningaasaataasa aqunneqarneranni suliffeqarfiillu ingerlanneqarneranni aningaasanut tunngasut naapertuuttumik isiginiarneqarsimanersut.

Nassuiaatit, nalunaarutit il.il. nalilersuinermit atugassatut suliarineqarsimasut tiguneqarnermik kinguningua ilisimatitsissutit Naalakkersuisunut nassiunneqassapput.

*Imm. 3.* Ataatsimiititaliap suliament atugassatut atortussat pisariaqartut, naatsorsuutitut uppersaait, nalunaarusiat il.il. oqartussamit naatsorsuuserisumit piniarsinnaavai. Ataatsimiititaliamut ilaasortat arlaata kissaatigippagu paasissutissat taaneqartut ataatsimiititaliamit piniarneqassapput.

**§ 19.** Namminersorlutik Oqartussat aktiaatilitut soqutiginninera Naalakkersuisut qanoq isumaginninnerannik Nunap karsiata Naatsorsuutaasa Kukkunersiorneqartarnerannut Ataatsimiititaliaq aamma nakkutilliisuvoq.

*Imm. 2.* Aktiaateqarluni ingerlatseqatigiiffiit Namminersorlutik Oqartussanit tamakkiisumik ilaannakuusumilluunniit pigineqartut ingerlanneqarneranni aningaasaqarnikkut innimigisassanik Naalakkersuisut naammattumik annertussuseqartumik qulakkeerinninnersimanersut ataatsimiititaliap imm. 1 naapertorlugu nakkutilliinerminut ilaatillugu nalilersorsinnaavaa.

*Imm. 3.* Aktiaateqarluni ingerlatseqatigiiffinni Namminersorlutik Oqartussanit tamakkiisumik ilaannakuusumilluunniit pigineqartuni Namminersorlutik Oqartussat aktiaatilitut soqutigisaannik ataatsimiititaliap nakkutilliinermini atugassatut ingerlatseqatigiiffimmit, pisariaqarpat aktiaateqarluni ingerlatseqatigiiffiit pillugit inatsimmi ingerlatseqatigiiffilluunniit malittarisassaani periarfissiissutaasut atornerisigut, paasissutissanik erseqqinnerusumik nalunaakkanik pissarsiniarnissamik Naalakkersuisut peqqusinnaavai. Ataatsimiititaliap kaammattuineratigut paasissutissat Naalakkersuisut pissarsiatik kinguarsaanertaqanngitsumik ataatsimiititaliamut atugassiissutigissavaat.

*Imm. 4.* Ataatsimiititaliami ilaasortaq kinaluunniit aalajangiiffigisassatut siunnersuummik Inatsisartut aalajangiiffigisassaannik imm. 2 3-lu naapertorlugit saqqummiussisnaavaq. Inatsisartunut ilaasortat ikinnerpaamik 2/5-liisa siunnersuut isumaqatigalugu taasippata siunnersuut akuersissutigineqartut isigineqassaaq. Siunnersuummut allanguutissatut siunnersuummik saqqummiussisoqarsinnaanngilaq.

*Imm. 5.* Paasissutissat isertuussassatut tunniunneqarsimappata ataatsimiititaliami ilaasortat allallu ataatsimiititaliap oqaluuserinninnerani najuuttut imm. 1 naapertorlugu ataatsimiititaliami ilisimalikkaminnik isertuussinissaminut pisussaaitaapput. Nutaatut ilaasortanngortoq kinaluunniit pisussaaffimmik eqquutsitsinissamik uppersaalluni atsiussaaq. Pissutsinik Namminersorlutik Oqartussat aktiaatilitut soqutigisaannut tunngasunik Inatsisartut ilisimatitsissuteqarfigineqarnissaat ataatsimiititaliap pisariaqartut isiguniuk ataatsimiititaliaq immikkuullarissumik isumaliutissiissuteqassaaq. Isumaliutissiissut paasissutissanik isertuussassanik imaqarpat matoqqasumik ataatsimiinnermi suliarineqassaaq.

**§ 20.** Inatsisartut Ombudsmandimik qinersisassapput Inatsisartut sinnerlugit Namminersorlutik Oqartussat kommunillu ingerlatsinerannik malinnaasussamik. Ombudsmandi inatsisartunut ilaasortaasinnaanngilaq inatsisilerituutullu ilinniarsimasuussalluni.

*Imm. 2.* Ombudsmandi Inatsisartunit tatigineqarunnaarpat Inatsisartut soraarsissinnaavaat.

*Imm. 3.* Ombudsmandip sulinera Inatsisartut Inatsisit Atortinneqarnerannut Ataatsimiititaliaata ingerlaavartumik malinnaavigissavaa. Ombudsmandi ingerlatani pillugit ukiumoortumik nalunaarummik Inatsisartunut saqqummiussisassaaq.

*Imm. 4.* Ombudsmandip pissutsit atugarisai erseqqinnerusut immikkut Inatsisartut inatsisaatigut aalajangersarneqassapput.

### **Kapitali 3**

#### *Nunanut allanut sillimaniarnermullu tunngasut*

**§ 21.** Inatsisartut Nunanut Allanut Sillimaniarnermullu Ataatsimiititaliaata nunanut allanut sillimaniarnermullu pissutsit Naalakkersuisuneersut suliassarai taakkunungalu attuumassuteqartunut sammisamut apeqquteqarsinnaallunilu oqaaseqaateqarsinnaavaq. Ataatsimiititaliap suliassaqarfimmini ineriartornermut malinnaalluarnissani pisussaaffigaa.

*Imm. 2.* Nunanut Allanut Sillimaniarnermullu Ataatsimiititaliami ilaasortat allallu ataatsimiititaliami oqallittoqarnerani peqataasimasut paasissutissanik ataatsimiititaliami paasineqarlutik paasissutissanik isertuussanik danskit naalakkersuisuinit Naalakkersuisuniillu tunniunneqartunik aammalu ataatsimiititaliap siulittaasuata tamakku saniatigut aalajangigaanut isertuussinissamik pisussaaffeqarput. Kinaluunniit ilaasortaq nutaaq aalajangersagaq taanna malinniarlugu inatsisinik malinninniarluni allakkatigut uppersaalluni atsiortinneqassaaq.

### **Kapitali 4**

#### *Atuutsitsisutut pissaaneq*

**§ 22.** Naalakkersuisunut ilaasortat Inatsisartunit taakku qinigaaffiannut atuuttumik qinerneqassapput.

*Imm. 2.* Naalakkersuisut siulittaasuut Inatsisartunut ilaasortat akornannit qinerneqassaaq.

*Imm. 3.* Naalakkersuisut siulittaasuut Naalakkersuisunut ilaasortanik qinigassanik amerlassusilikkannik aqqisigut taasanik Inatsisartunut inassuteqassaaq. Naalakkersuisunut ilaasortassanik qinersineqassaaq siulittaasup siunnersuutaa ataatsimut taasissutigineratigut.

*Imm. 4.* Naalakkersuisunut ilaasortaq Inatsisartunut ilaasortaanngitsoq Inatsisartunut qinigaasinnaaneq pillugu aalajangersakkanik sukkulluunniit atuuttunik eqquutsitsisassaaq.

*Imm. 5.* Naalackersuisunut ilaasortaaneq inuiaqatigiinnit toqqagaanikkut suliassiissutitut pisussaaffiuvoq.

*Imm. 6.* Naalackersuisunut ilaasortat ataasiakkaat akisussaatinneqartarnerat Inatsisartut inatsisaatigut immikkut aalajangersarneqassaaq.

**§ 23.** Naalackersuisut siulittaasuata Naalackersuisunut ilaasortat akornanni Naalackersuisut suliassaqarfii agguataassavai.

*Imm. 2.* Naalackersuisut siulittaasuata Inatsisartunut nalunaaruteqarnermigut Naalackersuisunut ilaasortaq qinikkatut atuuffianit atuukkunnaarsinnaavaa, § 27, imm.1 naapertorlugu ilaasortap Inatsisartunit atuukkunnaarsinneqarneratulli sunniuteqartumik.

**§ 24.** Naalackersuisunut ilaasortaq peqqiilliornerminik assigisaanilluunniit pingaarutilimmik pissuteqarluni sulinnigiffeqartitaanissaminik qinnuteqaateqarpat Naalackersuisut siulittaasuata qinnuteqaat akuerineqarsinnaanersoq aalajangissavaa.

*Imm. 2.* Naalackersuisunut ilaasortaq naalackersuisunit tunuarniuteqarluni qinnuteqarpat Inatsisartut qinnuteqaat akuerineqarsinnaanersoq aalajangissavaat.

## **Kapitali 5**

### *Atuuffinnik allanik tigummisaqarneq*

**§ 25.** Inatsisartut siulittaasuata, Naalackersuisut siulittaasuata Naalackersuisuniluunniit ilaasortaq ivertinneqarnermi nalaani allanik atuuffeqartoq inuussutissarsiuteqartorluunniit taakkunannga tunuassaaq.

*Imm. 2.* Inatsisartut siulittaasuata, Naalackersuisut siulittaasuata Naalackersuisuniluunniit ilaasortap atuuffiit inuussutissarsiutilluunniit taakku ingerlatiinnarumallugit kissaatigippagu Qinersinerup Misilinneqarnissaanut Ataatsimiititaliaq tamanna pillugu erngerluni nalunaarfigissavaa. Nalunaarutip tiguneraniit sapaatip akunneri pingasut qaangiutinnginnerini pineqartup atuuffimminik inuussutissarsiumminilluunniit taamaattunik ingerlatsiinnarnissaa ataatsimiititaliap itigartitsissutigisinnaavaa.

*Imm. 3.* Inatsisartut siulittaasuata imm. 2-mi piffissaliussap naanerata kingorna atuuffiit inuussutissarsiutilluunniit sorliit siulittaasup ingerlatiinnarsinnaanera Inatsisartunut nalunaarutigissavai. Naalackersuisut siulittaasuata atuuffiit inuussutissarsiutilluunniit sorliit Naalackersuisut siulittaasuata Naalackersuisunullu ilaasortat ingerlatiinnarsinnaaneraat Inatsisartut siulittaasuannut nalunaarutigissavaa.

*Imm. 4.* Inatsisartut siulittaasuata, Naalackersuisut siulittaasuata Naalackersuisunilu ilaasortat atuuffinnik inuussutissarsiutinilluunniit pineqartunik ingerlatsinermik saniatigut atuuffinnik inuussutissarsiutinilluunniit nutaanik Qinersinerup Misilinneqarnissaanut Ataatsimiititaliaq akuersereersimatinnagu tiguseqqusaanngillat.

## **Kapitali 6**

### *Inatsisartunut nutaamik qinersineq aamma*

### *Naalackersuisunik atuukkunnaarsitsineq*

**§ 26.** Naalackersuisut siulittaasuata piffissap qinigaaffiup atuuffiata naannginnerani Inatsisartunut nutaamik qinersinissamik nalunaaruteqassaaq.

**§ 27.** Naalackersuisut siulittaasuata imaluunniit Naalackersuisunut ilaasortat ataasiakkaat Inatsisartunit tatigineqarunnaarpata Naalackersuisut Inatsisartunit atuukkunnaarsinneqarsinnaapput.

*Imm. 2.* Naalackersuisut siulittaasuata atuukkunnaarsinneqarpat Naalackersuisut ataatsimoorlutik atuukkunnaassapput.

**§ 28.** Naalackersuisut siulittaasuata § 27 naapertorlugu Naalackersuisunut ilaasortamik imaluunniit Naalackersuisunik tamarmiusunik Inatsisartut atuukkunnaarsitsisimappata Inatsisartunut nutaamik qinersisoqassasoq ingerlaannartumik nalunaaruteqarsinnaavoq.

**§ 29.** Naalackersuisut atuukkunnaarsinneqarpat imaluunniit soraarnissaaq qinnutigippassuk imaluunniit nutaamik qinersinissaaq nalunaarutigineqarpat, Naalackersuisut nutaat qinerneqarnissaasa tungaanut Naalackersuisut atuukkallassapput. Naalackersuisuugallartut atorfimmi suliassat ingerlaannarnissaannut pisariaqartunik taamaallaat suliaqarsinnaapput.

## **Kapitali 7**

### *Inatsisartut inatsisaasa il.il. atuuttutut atsiorneqartarnerat atuutilersinneqartarnerallu*

**§ 30.** Inatsisartut inatsisissaattut siunnersuut akuersissutigineqartoq atuutilersinnaassaguni inaarutaasumik akuersissutigineqarnermi kingorna kingusinnerpaamik sapaatit akunneri sisamat qaangiutsinnagit Naalackersuisut siulittaasuannit atuuttutut atsiorneqarsimassaaq.

*Imm. 2.* Siunnersuutip ataatsimiinnermi tullermi Inatsisartunit akuersissutigineqarnissaata tungaanut siunnersuutip inaarutaasumik akuersissutigineqarnerata kingorna ullut arfineq-pingasut ingerlaneranni Naalakkersuisut aalajangersinnaavaat atuuttut atsiorneqarnissaa kinguartinneqassasoq. Ataatsimiinnermi maani siunnersuut allannguuteqartinnagu akuerineqarpat atorunnaassaaq.

*Imm. 3.* Aningaasaliissutinut inatsisaagallartumik imaluunniit nutaamik qinersisoqarnissaanik inatsimmik atuuttut atsiuinissaq Naalakkersuisut kinguartissinnaangilaat.

**§ 31.** Inatsisartunit inatsisit Namminersorlutillu Oqartussat nalunaarutaat allamik aalajangiisoqarsimangippat atuutilertarput Inatsisartunit inatsisip Namminersorlutilluunniit Oqartussat nalunaarutaasa ulloq taanna atuutilersutut nalunaarsimanerata kingorna ulloq aallartikkaangat.

*Imm. 2.* Tamanut saqqummiussineq qarasaasiat atorlugit pisassaaq. Naalakkersuisut tamanut saqqummiussisarnermut maleruagassanik aalajangersaassapput.

*Imm. 3.* Inatsisartut inatsisaat, Inatsisartut peqqussutaat imaluunniit Namminersorlutik Oqartussat nalunaarutaat tunngavigalugit kommunit maleruagqusaliaannut tunngatillugu imm. 1 aamma 2 taamatuttaaq atuupput.

## **Kapitali 8**

### *Atuutilerfia*

**§ 32.** Inatsisartut inatsisaat manna 1. december 2010-mi atortuulerpoq. Inatsisartut Naalakkersuisullu pillugit Inatsisartut inatsisaat nr. 11, 20. oktober 1988-imeersoq tamatumunnga peqatigitillugu atuukkunnaarsinneqarpoq.

*Imm. 2.* Inatsisartut Naalakkersuisullu pillugit Inatsisartut inatsisaat nr. 11, 20. oktober 1988-imeersoq tunngavigalugu malittarisassatut aalajangersarneqartut malittarisassanik Inatsisartut inatsisaat manna tunngavigalugu aalajangersarneqartunit taarserneqarnissamik atorunnaarsinneqarnissamilluunniit tungaanut atuutissapput.

-----  
Inatsisartut Naalakkersuisullu pillugit inatsisartut inatsisaata allanngortinneqarneranik Inatsisartut inatsisaat nr. 12, ulloq 29. november 2013-imeersoq § 31-imullu tunngasoq atuutilersitsinissamut ima aalajangersagartaqarpoq:

### **§ 2**

Inatsisartut inatsisaat manna 1. januar 2014 atuutilissaaq.

-----  
Inatsisartut Naalakkersuisullu pillugit inatsisartut inatsisaata allanngortinneqarneranik Inatsisartut inatsisaat nr. 30, ulloq 9. december 2015-imeersoq §25, imm. 3-mut kiisalu § 31, imm. 1-imut tunngasoq atuutilersitsinissamut ima aalajangersagartaqarpoq:

### **§ 2**

Inatsisartut inatsisaat januaarip 1.-ni 2016-imi atuutilissaaq.

-----  
Inatsisartut Naalakkersuisullu pillugit inatsisartut inatsisaata allanngortinneqarneranik Inatsisartut inatsisaat nr. 2, 29. maj 2020-meersoq §12-imut tunngasoq atuutilersitsinissamut ima aalajangersagartaqarpoq:

### **§ 2**

Inatsisartut inatsisaat ulloq 1. juli 2020 atuutilissaaq.

**Inatsisartut**

[www.inatsisartut.gl](http://www.inatsisartut.gl)  
[inatsisartut@inatsisartut.gl](mailto:inatsisartut@inatsisartut.gl)